

主编 孙忠焕

杭州运河文献集成

②

杭州文脉记

杭州运河文献集成

(第二册)

孙忠焕 主编

杭州出版社

图书在版编目(CIP)数据

杭州运河文献集成. 第二册 / 孙忠焕主编. —杭州:
杭州出版社, 2009. 2

ISBN 978-7-80758-183-3

I. 杭... II. 孙... III. ①大运河—文献—杭州市
②杭州市—地方史 IV. K928.42 K295.51

中国版本图书馆 CIP 数据核字(2009)第 011581 号

第二册总目

- 北郭诗帐 丁 丙(1)
- 北隅缀录 北隅续录 丁 丙(115)
- 北隅掌录 黄士珣(283)
- 三塘渔唱集 丁 丙(361)
- 东城杂记 厉 鹗(427)
- 东城记余 杨文杰(489)
- 艮山杂志 翟 灏(617)
- 东郊土物诗 朱 点(795)
- 武林市肆吟 丁立诚(827)
- 迎銮新曲 厉 鹗 吴 城(849)

北 郭 诗 帐

[清]丁 丙 撰
王其煌 标点
徐吉军 审校

说 明

《北郭诗帐》二卷，清丁丙撰。

丁丙(1832—1899)，字松生，号松存，清钱塘(今杭州)人。著名藏书家。其八千卷楼藏书颇丰。为清末全国四大藏书楼之一。清咸丰十至十一年(1860—1861)，太平军入杭，文澜阁《四库全书》遭毁，后丁丙、丁申兄弟冒死抢救库书，并主持重修文澜阁，组织补抄库书，使库书大体得全，其功颇巨。同治、光绪间，丁丙又参与西湖疏浚，恢复西湖景点等。

所谓“北郭”，是杭州湖墅的通称。丁丙娶妻凌氏，即湖墅珠潭(珠儿潭)凌氏之女，故丁丙自称“湖墅实婿乡也”。又曰：“尝读王侍讲《夹城八景》词及厉征君《北郭纪游》词，心窃艳之。”以为“湖墅地虽一隅，而舳舻千里，烟火万家”，宜有“模范表章，以纪掌故”。然湖墅前有魏标曾著《湖墅志》四卷未梓已毁，仅存杂诗百章，后有王松溪思辑旧闻，劳于吏役，亦未成书。光绪二十四年(1898)，丁丙已入晚境，衰病日侵，为留文献，遂“旁稽群籍，信口成吟”，撰成《北郭诗帐》。诗集之命名由来，丁丙自言因湖墅自宋迄明，未有定名，通称“北郭”，而其所撰之诗，自谦“类簿录，殊乏风雅”，故借苏轼“诗帐”之称，定名《北郭诗帐》。此诗集成，由丁氏开雕，列入《武林掌故丛编》之一。今据此标点重印。

序

通都大邑，必有魁人硕士，乘方兴之运，以清辞巨笔，纪数百年之掌故，使四海如一室，千载如一时，然后见诗之为用，非末技也。呜呼！有志于此者，疲神于载籍之中，焦思于委巷之间，其劳盖亦甚矣。夫其所以为此者，抑岂徒为歌咏而已哉！亦将备他日志乘之采，不使湮没无闻。而惜乎得此者，鲜也。若今松存丁公之《北郭诗帐》，其得此者欤！公姿性过人，才高学博，识见卓且远，故其为诗，下笔立就，不见有艰难意。北郭为杭之一隅，人文之蔚起，科第之联绵，代不胜数。公少娶于北郭凌氏。德配凌宜人，素工哦咏，著《翠螺阁诗稿》。画眉余闲，时相倡和。多写景咏物之作。惜乎琴亡境过，中更兵燹，北郭为戎马之场，前稿亦毁，有难以寻鸿泥之印者。国家中兴，大吏知公才，以杭城振抚善后事畀公。公有高尚之志，而具兼善之量，不敢固让，出而应命。为善于乡者，三十余年。若兴社学以端士习、浚墅河以卫农田、设富义仓以裕民食、建拱宸桥以便行旅，即北郭之受公惠者，亦非一端，其他可知。公又不仅以诗名也。雅好掌故之学，曾刊魏氏书青《湖墅杂诗》，收之《掌故丛编》。暇复搜罗载籍，系以韵语，自注出处，一依魏氏之旧。传古人之轶事，备史家之采摭，其浩博远过魏书。余早尝有志兹事，向以与公有同里之好，数尝从论著之末。蒙公不弃，尽出八千卷楼所藏，作馈贫之粮。余因辑《下

湖小墅述闻》四卷，就正于公。诿意公不我留，忽归道山。今哲嗣和甫孝廉，携公所为诗见示，且征言以弁其端。余遂为之论次。后之诵此诗者，当知余言之不诡也。

光绪二十五年夏五月，钱塘王庆霖寿庄氏序。

自序

余兄弟并娶于珠潭凌氏，湖墅实婿乡也。尝读王侍讲《夹城八景》词及厉征君《北郭纪游》词，心窃艳之。谓湖墅地虽一隅，而舳舻千里，烟火万家，岂无模范表章，以纪掌故者？叩之翠浮阁主，则云魏氏书青曾著《湖墅志》四卷，未梓已毁，其仅存者，杂诗百首耳。顾印本亦未之见也。驹隙易驰，鹤警忽迫。庚辛两劫，浙河尘昏。湖墅戎马出没，蹂躏惨烈更不待言。甲子运转，镇市镜清。王子松溪，思辑旧闻。劳于吏役，初未成书。高子海垞新编小志，详近略远，引证无多。余年来衰病日侵，旧游如梦。偶一追忆，觉卅年情景，恍在目前。因就魏诗之外，旁稽群籍，信口成吟。即间与魏诗复出，要皆别有补缀，未敢分津拾慧，取盈篇什。惟湖墅自宋迄明，终鲜定名。统之曰“北郭”，较近古初。诗类簿录，殊乏风雅。特假坡公“诗帐”之称，聊续漫叟乡谣之旧云。

光绪戊戌冬月，东里丁丙松存氏自序。

北郭诗帐卷上

穹碑万寿祝无疆，茵草无尘舞蹈扬。迎送御舟齐跪道，荆街如砥枕河傍。

《万寿盛典初集》：康熙五十二年二月十八日，万寿覃恩。以天下地丁钱粮，已经轮免一周，其京城及各省房地租税五十三年额征，并历年逋欠，亦予豁免。护理浙江巡抚布政使臣徐栢谨为圣主爱养弥宏，臣民受恩无既，吁恳代题恭谢天恩事；据杭处等十一府属绅衿徐潮等，合词呈称为圣泽同天，皇仁广被，特请代题恭谢天恩事；又据合属耆民王国瑞等，呈为圣恩浩荡如天，万姓欢呼动地，谨抒下情，吁请代题恭谢天恩事；又据杭州右绍宁台温处等八卫、嘉湖衢严海五所呈请，据各卫所屯运伍老兵丁赵恩、潘美等呈称，惟我皇上特旨，念切军民，将五十年额赋敕赐全蠲，历年旧欠又复免征。备历下情，顶谢伏乞。据情转详，题达等情到臣。据此，该臣看得浙省康熙四十八年钱粮，曾蒙蠲免，今又蠲免五十年钱粮。三载之中，两载被泽。康熙四十五六七年，旧欠分年带征，今又免征历年旧欠。一岁之内，数岁沾恩，有司省催科，必劳心于抚字，万

姓皆温饱，宁致虑乎饥寒。是以十一府之绅衿士民、八卫五所之运丁屯伍，莫不欢声震天，咸仰一人有庆，顿首动地，共祝万寿无疆。兹据布政使徐榘、掌印都司缪肇祺详请，代谢天恩前来。臣谨会同署福浙总督事务福州将军臣祖良璧合词具题，伏乞皇上睿鉴施行。王麟书《湖墅旧闻》：万寿无疆碑，在荆街旗坛寺前。左右有小字二行云：“康熙五十二年三月十八日，浙江绅士、耆民、商贾、兵丁公立。”凡二十三字。相传仁庙六旬万寿，徐文穆公率绅民兵丁于此建亭恭祝。其地宽广平坦，嗣后纯庙南巡，杭之士民均于此跪道迎送焉。洪瞻祖清远山人稿《荆街行》：“武林周道夷如掌，肩摩毂击纷来往。逶迤十里旧康庄，裘马翩翩珂佩响。”

诏停关税杜侵欺，商贾船头乐且嬉。桥栅津亭重位置，黄旗高揭奉抽厘。

凌璋林《梓里丛谈》：湖墅北新关，征税烦苛。关胥巡役等，向来视为利藪，藉端需索，肆意诛求。商民视为畏途。同治三年十二月，左文襄巡抚吾浙，奏请暂停。奉上谕：“左宗棠奏请，‘将北新关暂缓开设，按月由厘捐酌拨，以抵关税一折，据称浙省迭遭兵燹，凋敝不堪，市肆萧条，小民未能复业。即设法招归，疮痍犹难遽复。若再竭泽而渔，不但百货腾贵，商贾糊口无资。即此孑遗之民，生计益形穷促。北新关试办已逾三月，征数寥寥。实因关胥巡役等，向来视为利藪。一经设关，故态复萌，藉端

刁索，以致商民，视为畏途，裹足不前。请将关税暂停，以顺舆情’等语。所奏切中地方利弊。浙省蹂躏已深，正宜休养生息，以培元气。若任令关胥巡役人等，擅作威福，肆意诛求，于国课毫无裨益，而间阎苦累甚深，殊非体恤商贾之道。著恒延将北新关暂缓开设，关口各税一概暂停抽收，毋得任听关书等怂恿，别生枝节。并著照左宗棠所拟于浙江各属厘捐项下，按月划拨钱一万串，解交织造，为采办一切工料之需；另拨银一千两，津贴织造司库司等办公，及该衙门书吏匠役纸张饭食各项用费。余著照所议办理。俟军需一律告竣，厘捐停止，再行循照旧章办理。该部知道，钦此。”诏旨既下，远近欢声雷动焉。

仁和积岁患区荒，地瘠钱塘数四乡。两路输粮无耗折，斗升直达便民仓。

《浙江通志》：仁和县便民仓，在墅河旧马头。钱塘仓在高露乡北新桥南、河西水次。

刘孟安尝镇北关，谋危吴越犯王颜。若非成及胡床制，腰鼓城沾战血殷。

钱俨《吴越备史》：节度使、检校太尉兼侍中成及，字宏济，钱塘人也。祖克评，嘉王府长史；父贞，国子博士。及性淳厚，为乡里所重。咸通中，捍山中贼，逐齐寇，声名遂振。及八都浸盛，复分十三都。遂以富春镇为靖江都将属。刘汉宏作乱，与王同事攻讨。汉宏平，北关镇将刘孟安谋乱，即席奋

剑将犯王，及举胡床制之。偏将盛造因执孟安就戮，以功奏迁散骑常侍，复为靖江镇将。

身老诗穷意转闲，影行垂柳望中山。临安只志赵循道，一首新诗出北关。

《咸淳临安志》：赵循道《泛舟晚出北关》诗：“舟泛寒塘静，人归一叶间。影疏行处柳，青远望中山。道在身从老，诗穷意觉闲。到家秋敛足，有谓掩柴关。”

陇西信乃汴儿医，毫赐安轮入禁墀。八世孙瑢还北郭，槐门装点李车儿。

万历《钱塘志》：李信汴人，小儿医也。官院判。从高宗南渡，家临安。高宗危疾，诏信入侍。因年耄，赐安车入禁，时号李车儿。八世孙瑢，明永乐时，亦召入禁官御医。康熙《钱塘志》：李信八世孙瑢，明永乐时官御医。始移居北郭，植槐于门。门前雕香婴，衣绣祿，坐竹车，以为标致，数典忘祖，可笑也。

处士周公德配陈，青莎老屋守清贫。彭城遭溺家回禄，慈孝天全进士君。

马三才《松里文选·居竹周公暨配陈孺人墓志铭》：处士居竹周公者，进士诗之父。公讳文冕，字子中，号居竹，竹塘人。八世祖纯，居青莎左桥；祖祺，以齿德宾郡乡饮。生子：长春原公霖，次东谷公震。春原娶吴氏，生子三：长文鼎，福山孝谕，次文

孺，次即公。是时坦峰陈公讳衡，生女有闺德，为择配，与周公世邻，数奇公，因以归之，即配陈孺人是也。东谷公出赘张给谏晟之从妹，无子。以诸子中公最贤，遂后公。公幼习举子业，授《尚书》于母弟、乡进士吴宗武氏，及出后东谷，乃将学悉弃，而代综家政，遗东谷以逸老焉。东谷没，公哭尽哀，治丧如礼。先是，公尝代东谷挽赋彭城，遭漂湿，继罹回禄之变，家日落，而公又早世，孺人茕茕，复当大故。顾谓进士君曰：“敬殡葬诸仪，一不如女父待女祖，时人谓我何！”殫力襄事甚备，人以为难。方回禄时，焰入进士君寝所，几剥肤。孺人仓卒挟从楼中出，坠地以免。时坠地者，类触石折股，而孺人母子无恙。进士君尝曰：吾母盖二天。

宣德征船正德商，图分四境慎提防。六关七务归铃辖，不外心存公恕堂。

许梦闾《北新关志·建置志》：明始设七税课司局，于杭州征商税。而北新钞关之立，则自宣德四年始。成化四年，废，寺复设。其初，止收船料，而兼收商税则始于正德之年。按：《志》首有《北新关四境图》。又《铃辖志》：六关，一东新关、一打铁关、一观音关、一板桥关、一良畎关、一良马关。为务者七，一杭州府中务、一江涨务、一城北务、一城南务、一横塘临平务、一西溪务、一安溪奉口务。又《公署志》：许天赠曰北关官署建不知何年，有堂以发号，有厅以寅宾，而匾曰“忠恕”、曰“存心”、曰“独知”。

孔家灵产慕冥鸿，北郭舟参杜子恭。乞缮上清经箓语，
洵宜有子绍仙踪。

陈文述《西泠怀古集·钱塘北郭怀孔灵产》：灵产，名默，会稽山阴人。泰始中，罢晋安太守，有隐遁之怀。于禹井立馆，事道精笃。东出过钱塘北郭，于舟中遥拜子恭墓。并从许黄民求杨许真书，令郡吏王兴缮写。见《真诰》及《云笈七签》。子稚圭，即撰《北山移文》讽周彦伦者。

识字耕夫客永康，忽从兵火梦还乡。甘泉坊近羊角埂，
喜与故人话草堂。

罗以智《开林经籍志》：《草阁集》六卷，明钱塘李昱撰。昱，字宗表，号草阁。洪武中，官国子助教。元季，避地永康、东阳间。馆于胡氏，故《集》中怀胡伯宏兄弟赠答之什最多。按《集》中有自撰《识字耕夫传》，又有《庚子春三月，梦与梁生建中回故居》云：“春宵苦梦短，合眼在故乡。今宵复何为，历历所见详。天风吹我巾，明月照我裳。手持绿玉筇，衿佩同翱翔。路从北郭门，径指先茔傍。五年缺洒扫，青草如人长。不忍遽去之，徘徊流涕滂。迂行羊角埂，载出甘泉坊。河西与河东，人烟渺相望。屋庐间新旧，田园半榛荒。故友四五人，相逢诉衷肠。剪韭烹枯鱼，款坐陈酒觞。喜极仍自疑，兵戈正纷攘。人生无羽翮，何以逾津梁。啮指验所经，恐为覆蕉隍。鸡鸣声啾啾，惆怅身在床。山川限吴越，依旧天一方。辗转久不寐，郁纡只自伤。

披衣起待旦，聊以成短章。”

《北关八咏》目空存，诗墨伊谁补阙文。输与友庄庵十景，后先题笔满烟云。

黄官臻《北关志》：《北关八咏》，旧有诗，今仅存其目：户部开司、芳林即景、化度绀园、明景琳馆、康桥晓市、龙舌清流、北新泛鹤、南石垂虹。吴灏《杭郡诗辑·柴望题友庄庵十景》：“《绕屋梅花》：梅花愈作花，花开白于玉。密密复斜斜，无枝不绕屋。

《倚楼临水》：空潭净无尘，与天同一色。脉脉倚楼人，于兹若有得。 《远树柔蓝》：参差远树枝，春光见来早。筇路旧时衣，休夸颜色好。

《乾溪雨涨》：寻常无斗水，沙石明可数。绿涨何由生，多绿昨来雨。 《夏木垂阴》：古木立四周，交柯密无罅。六月敞亭台，悠然不知夏。

《疏雨梧桐》：碧树金井头，高枝攀莫及。漫说坐题诗，叶叶尚沾湿。 《三秋丹桂》：八月丛桂开，飘风朝及夕。何必白侍郎，人皆识佳客。

《古寺鸣钟》：或逐晨风飘，或带夕阳度。一杵响空山，白云笼不住。 《秋深红叶》：一夜著严霜，红霞映帘幕。矫首望秋空，庶几不寂寞。 《远山雪霁》：雪霁起看山，开帘气凜凜。安得飞白手，传此数峰出。”

鲁峙临安送所亲，质衣库见旧时人。北关朱子文相述，前乞缘奇得瓮银。

《咸淳临安志》：京师人鲁峙，绍兴十一年，在临